

# OMUKUETU

No. 4

April

1953

"MUA NA NDJE KAMU VULU  
OKULONGA SHA" Joh. 15:5.

Oohapu dika da Jesus oda fa oonkunkutu, oshoka tadi kandula po etindo kehe. Ihe nge tatu tala uujuni nkene ua tja, kua fa taku longua oshindji kuaa na Jesus, eeno, iilonga ja fa iinene nokuli. Oku na uo iilonga kaji vulika okulongua manga Jesus e li po. Otse aakriste tatu adika uo kiinima nomoluajo tu nokueca Jesus nge tatu kala najo. Ojendji osho taa ningi uo.

Aalongua je Jesus okue ja lombuele oohapu tuu dika. Nongashingeji ote shi lombuele kehe tuu ngoka a hala okulonga sha medina lje, ongele omutumua nenge omusita nenge omulongi nenge omujevangeliste, eeno, omukriste kehe.

Ondu uvu ehokololo tali hokolola, omuvinu guaa kuninue nkene gua holoka. Okua li ku noshitaji oshitalala shomomuvinu gua tsikua. Oshitaji shono shi ijelua pombanda, omandjembele ga pje naua. Ihe shono inashi opalela oshitaji shi kale aluhe shi nekuatacano nomuvinu guoguene. Osha hala okumanguluka, opo shi inanjude. Osho sha tameke okuikokica nokuindjipalica uule uasho, sigo sha ada kokule nomuvinu guoguene. Navulua sha kuata evi nosha tameke okuninga omidi. Osho sha ningi ihe omuvinu tagu ikalele. Ogua koko gua zizi nogua ningi iitaji niifo ojindji. Ogua li guo opala shili. Ihe pecimbo ljiijimati kua dimbululua, kutja, kamua li omandjembele. Oshitaji kui sha hala okuninga omuvinu, osha adika sha ningi omuvinu guomomugulu ihagu iimi.

Jesus ta ti: „Ongashi oshitaji kashi vulu okuiima musho shene, ngele itashi kala momuvinu, noshonane uo ngele itamu kala mungame.” Jesus a dimbulula, aalongua je otaa pumbua okukumagidua jaa ikalele ngaaka, opo jaa kale mboka taa vulu okukala jaae mu na. Natse uo, aalongua je jongashingeji, tatu pumbua okukumagidua kuje molu oshinima osho tuu shika: „Muaa na ndje kamu vulu okulonga sha.” Ngele tu nehalo okulonga oshilonga shoshilongo sha Kalunga, otatu ji nuupu moshiponga shika: tatu itala tatu vulu sha. Tatu jelekele okulonga nokukondja tuua na Jesus. No nando pu talue tua guapica uo sha, natango tuu etokolo lja Jesus oljo ndi; „Inaku longua sha!” Ano iilonga jetu jene jomoshilonga shoshilongo sha Kalunga, kaji na nando oshilonga. Nisheue ngele katu nehalo ljo kulonga oshilonga shOmuaa, osha fatuka uo moohapu tuu dika da Jesus: „Muaa na ndje kamu vulu sha.” Ehalo tatu peua ashike nokuti ndila muje. „Oshitaji kashi vulu okuiima musho shene.”

Ihe oohapu dika da Jesus kadi nombinga ndjika ajike, kutja „kamu vulu”. Nonando oohapu dika „muaa na ndje kamu vulu sha” oonkunkutu ku nguka ihole muene no ti idiladilile pombanda, ihe oku nguka ihole oje omunjengui nomuheci moshilonga shoshilongo sha Kalunga, okuje oohapu dika odehekeleko shili. Oohapu odo tuu dika de tu tsumukumo okuza koshilongo shaandjetu nukuja okutaandelica elaka ljevangeligi omoshilonga shika tashi tu njenge nokunjengelele. Osho uo aauambo ojendjijendji, ja tsuaa omukumo koohapu tuu dika, sho je li po taa taandelica elaka

lievangeligi. Inatu pumbua okulonga uushona uushona tue ji tsakanica nenge uunkundi uetu, aue. Oje muene ota si oshimpuju shoshilonga she, shaa tuu tatu tindile muje.

Otu li po tuu iitaji jomomuvinu Kristus ji nomuenjo? Otu li po tuu mboka ihatu tameke nando oshilonga shimue moonkondo detu jene? Otu li po tuu mboka tu noonkondo detu mu Kristus? Taa hala tuu nenjanju okukala tu nekuatacano naje? Nenge pamue otse iitaji jomuvinu guaa kuninue tua tsikilue momuvinu Kristus, ihe koncho tua kokekele meipangelo no tua tsikua mev. ljuujuni mbuka? Okutalua kombanda tua fiitaji iitalala, ihe pecimbo ljiijimati taji gongelua, tatu adika tu li ouala tua guana okuumtilua momulilo ngashi iitaji iikukutu? Iitaji ja tja ngaaka ojo aakuanegongalo kaje na nando oshimpuju shegongalo ljaandjauo, ndjoka otutu lua Kristus, ihe aluhe haa lalakanene oshipe.

Jesus ota ti: „Kalenii mungame.” Oje a hala tu kale iitaji ji nomuenjo. Oje a pumbua aakriste ja tja ngaaka. Oje, Omukulili guetu, oku noonkondo okutsikulula mo iitaji notaji kokele muje. Oje a hala oku shi ninga. Tu endeeleni ano okuja kuje. Oje e noonkondo niipalua joku tu pa, tse tu uape okukala tu njambeko mokukalamuenjo kuetu. Oonkondo niipalua mbjoka ojo edimo ljoondjo. Katu mu na, katu vulu sha, ihe muje tatu vulu ashihe.

Jalmari Marttunen.

## OJE OMBILI JETU.

Ef. 2:11-22.

Ongoka e shi shi „oje ombili jetu”, oje okua dimbulula oshiholekua shekulilo ljetu. Eeno, ando tu kale tu shi uuvite no tue shi itaala shili, ando uujuni mbuka uongashingeji tau lundululua shili kehokololo ljoonzapo ja Kristus tuu ngoka.

Aajuda naapagani oja li ja topolua „kekuma lja li pokati”, osho uo aajuda naasamaria, aafarisaji naasadukaji, aavalekeka naapika. Ajehe oja li ja topolua komalimbililo noketondacano. Ihe ajehe oja li je cike pamue mpoka sho ja li ajehe „aatondi ja Kalunga.”

Ngashingeji omujapostoli Paulus ta hokolola, nkene ku Golgata kua longua shoka sha li sha njengana palue: aantu ja hanganicua na Kalunga, noshu uo aantu naantu ja hanganicua. „Omua ningi ojopopepi”, oljo elaka etoje ljevangeligi, ihe otse katu nokudimbua po kutja shika osha ningua „omombinzi ja Kristus. Oshoka oje ombili jetu.”

Aatondi naokolokoshi jonaale, „oondjendi naakuilongo”, ngashingeji oja hanganicua shili kumue noja peua ompito okucika ku Tate mOmbepo jimue. Ompito ndjika tu ji na otaji tu ningi „gumue mu Kristus Jesus”, „oshoka omolue otseni atuheni otu nompito okucika ku Tate mOmbepo jimue.”

Pecimbo ndika tali tu dimbulukica naanaa oshilonga shika shehanganico, ando tse tu hangane uo shili megalikano okugalikanenacana onga mboka tua li kokule no tua ningi ojopopepi.

(Elundululo)



OHOOLE.  
1Kor. 13.

Omuntu nando a peua okutseja nokudimbulula oshili ja Kalunga miholekua ja Kalunga inashi tsejika kojendji, ihe kee nohoole, omuntu ngoka ouala e li. Paulus ota ti: Omuntu nando na kale e neitaalo ta vulu okudikula po oondundu, ihe kee nohoole, oje kee na sha. Paulus ita popi eitaalo ndjoka lja sa, aue, ota popi eitaalo ndjoka li nomuenjo, ondjoka tali kua-ta Kalunga moohapu de notali longo naje iikumicalonga. Eitaalo lja tja ngeji ngele kali nohoole, ouala li li.

Omuntu ngoka ha ti: epistoli kaakorinte 13, oljo euanaua, li noohapu oontoje, ine li lesa je kee li uvi-te sho tali ti. Nande a kale nuunongo je kee nohoole, ouala. Oohapu oonkunkutu Paulus sho ta ti, ongoje oshijuma shi li ouala sho uaa nohoole. Omuenjo otagu tameke peni pahapu da Kalunga? Mpoka kape nohoole, kape nomuenjo uo. Ongashi Johannes ta ti: Otua za meso notua ja momuenjo, oshoka tu hoole.

(Elundululo)

UUJAPUKI U'UUJAPUKI  
TATU KA CIKA KO TUU?  
Heb. 12: 22-25.

Ontumuafo ndjika jokaaneberi otatu mono mo oombinga oonene ndatu:-

Uujapuki ua Kalunga, uusaseri nehangano, Kalunga ta hangana naantu.

Omujapuki ua Kalunga sho e li po omujapuki, okua lombuele Moses a longekide naua aantu. Ojo je nokujoga oonguo dauo, na jo jene je nokuijapula. Nelongekido ndika lja ningua omasiku gatatu, opo taa vulu okuheda ku Sinai, kondundu ondjapuki na o-ka Kalunga ta kulukile ko. Ehangano ndika oljo ljo-tango. Muljo Kalunga okui iholola omulaadi, ngashi te shi holola nauelela miipango je iijapuki. Ondundu ja Sinai na ajihe mbjoka jomahaluco omatilico omene ga li ko, oga hololele aantu jomEtestamenti E-kulu uujapuki ua Kalunga.

Ihe oteksti ndjika taji popi ondundu ja Sion. Mpaka tua tulilua eadimo ncsimano, muukumue mboka aakriste je ja mo. Ihe ku Sion oku uda uujapuki. Oshoka tatu pitikua okuheda kuujapuki uomegulu. Ihe tu nokuijapula okuijapulila uujapuki ua Kalunga nokuninga ngashi tatu lombuelua:

„Simanekeni pombanda Omuaa, Kalunga ketu; ne mu isizimike pekota ljondundu je ondjapuki, oshoka Omuaa, Kalunga ketu oje omujapuki!”

Ndele dimbulukua, oja lombuelua: „Ijapula.” Nangoje uo ijapula u uape oku mu simaneka nokuisizimika koshipundi shesilohenda.

Ihe tse aantu aalunde otatu shi ningi ngiini? Oshoka omuntu mokukala kue oje omuuinaji nehalo lje li nondumbo na Kalunga omushiti gue.

Mu Israel oja li je na omusaseri oku ja jakulila oondjo dauo e di fale ku Kalunga, nomajambo gauo. Ihe oonkambadala dauo adihe inadi kuaca sha. Kohoole onene je Kalunga okua tumu Omujakuli omujapuki oku tu jakulila elago ljetu.

Oje Jesus Kristus, Omuna gua Kalunga. Oje kee shi andola omujakuli ngaashi aajakuli hatu ja mono moombala daakuanilua, aue, ndele oje Omujapuki gua Kalunga. Oje omusaseri omukuluntu ongoka a uapa okueta peha ljetu ondjambo ja guana sigo aluhe. Mombinzi je jeshashameno otse tua japulua no tu nompito jokuja muujapuki u'ujapuki. Esilohenda li cike

peni! Nenjanju li cike peni, ngashi Jesaja a ti: „Oonakuhepekua otaa ka njanjukululilua Omuaa, naatokelelela jomokati kaantu taa ka ligolelela Omujapuki gu Israel.”

Omukuetu, uusiku ua ji, etango lja piti. Pulake-na eigido enene, sho taku tiua: „Eteleni Omuaa esimano, zaleni uulenga uujapuki! Opo mu isizimike koshipala shel!” Otse katu shi ue aalelua jouala, no katu shi aajenda, aue, omolua Jesus otse tua ningi aanegumbo lja Kalunga.

Ihe ngashingeji tu li manga megongalo hali kondjo. Ndele Johannes ta hokolola ta ti: „Ongame no nda mono-Onzigona ja cikama kondundu ja Sioni, no pamue naje omajuvi gecele no gomilongo ne na gane, je nedina lje, nedina ljohe lja njolelua miipala jauo.”

Omongundu ndjika nangoje uo omo tuu u li?

OMEHO GA TAALELA OMUTAMEKI  
NOMUGUANICI GUEITAALO.  
Heb. 12:2-3.

Aamuameme mu Kristus Jesus, tu dimbulukueni uudigu u' uujuni mbuka, kau na sho tau ningi (tau vulu)ku mboka ja dama mongodi ndjoka ontiligane jehupico.

Onke onda hala uo tseni atuheni tu tale oohapu dOmuaa Jesus, sho ta ti: „Ikolelени, ongame nda sindi uujuni.” Mematuko ndika tu li mo, tu matuke shili nokutalela Kristus Omuaa, otse e tatu ciki ko kecikilo ljaana ja Kalunga. Omujapostoli guOmuaa Paulus ota ti: „Ongame onda dimbua mbijaka jokonima, e te matukile kondjambi jesindano.” Poohapu dika otatu dimbulukua uo Omuaa Jesus sho ta dimbuluca aalanduli je. Oje ta ti: „Kaku na omupululi ta tala lvanima je kuo opalele ando oshilongo sha Kalunga nokuli.”

Onke anc aamuameme mboka tu ljeni metegamo no mematuko ndika, tu dimbulukueni uudigu kau na sho tau vulu, shaa tuu tatu matuka nomeho ga taalela omutokoli nomuguanici gueitaalo.

M. Shikongo.

OONKUNDANA DOKAKU.

Okuza eti 16 - 20. 2. 53 egongalo ljokOkaku lja gongalele oshiuike shOmbibeli keuiliko ljomusita Efraim Angula guokOntananga. Okuza tuu esiku ljotango omusita omuholike sho kua ciki ko, ongerki ja kala ju uda aantu ja fa taji hala okutopa sigo okolupanda; miigongi mbika Kalunga okue tu popica shili. Omasiku getameko tua cindilua muunjengui tatu nje-ngua okuihupica moondjo. Ooshili domOmbibeli de tu tompo: „Opo kehe okana ka mutikue nuujuni auhe u tompue u. noondjo koshipala sha Kalunga.” Omasiku ga landula pua hololua noshili jOmbibeli uujuki ua Kalunga uomeitaalo lja Jesus Kristus tau ja mu ajehe no kape nejoololo pokati komuntu nomuntu. Omasiku gaali ga hugunina uunene esiku ljuhulico tua li tu nokuligolelela moomuenjo detu ondjambi jesilohenda tatu ke ji peua ku Jesus Kristus.

Ijaloo Jesus, sho ua tumu omusita Efraim!

MOkaku 21. 2. 53.

R. Uushona.



## EPANDULO.

Otse aaniipa otatu hambelele Kalunga, oshoka okue tu tumine ekuaco euanaua shili moluhepo ndoka lue tu aada molupe luoshikungulu sha jono oondunda detu diipeleki mu November. Aakriste ojendji mboka ja kundana oshiponga shika, oja penduka oku tu kua- ca pankondo dauo. Kokule ku Amerika nokuli omuselekadi gumue omusuomi okua gongele iiponda ji vule £70 nokue ji tumu nkuka. Osho uo omulongi gumue omburu okua tumu £50. Ope na natango oomburu mboka ja tumu iiponda jauo omofu ehanganano ljaakriste ajehe kombanda jevi.

Ihe shoka she tu njanjuda unene osho ongalo ja ningua kaauambo joku Grootfontein nokomikunda dako. Aamati aauambo sho ju uvu oshiponga sha aada oongulu detumo ljauro, ngashi oshinjanjangido, moka tamu zi omambo gauo niifo jauo, oja tula mo iimaliva ojindji, ajihe kumue ji vule £8, omujevangeliste gauo Jason Haufiku nokue ji tumu kOniipa.

Kalunga na hambelele shili, sho ta holola ngeji ekuatacano ljetu meitaalo limue nomoshilonga shimue shokutaandelica oshilongo sha Kalunga mokati kaauambo. Aagandji ajehe otatu ja halele ejambeko lja Kalunga.

Medina ljaaniipa ajehe,

Elias J. Pentti.

## AAPANGELI JIILONGO.

Omupangeli guoshilongo sha arussia JOSEF STALIN a mana oondjenda de eti 5 lja Maart. Peha lje pua hogololua A. MALENKOV.

Oshilongo sha israel sha mono omupangeli omupe, edina lje JITZHAK BEN-ZVI.

Omupangeli omupe gua U.S.A. (Ehangano ljiilongo ljoku Amerika) EISENHOWER sho kua taamba oshilonga she, okua galikana, Kalunga a gandje oonkondo noondunge kuje muene naajakuli je jomepangelolo opo ja tseje okulela nuujuuki nokukonga aluhe uuanaua oshilongo nouaantu jomusho, ha shoka shauo jene. Nokue mu inekela ongundu jaasitagongalo aaluude ja jile kuje no je mu jaalele uucigona uauo. Oje okue ja taamba naua nombili.

Omukuaniiua, omupangeli guonale guoshilongo sha holland, WILHELMINA a njola embo ljehe mpululo ljeitaalo lje ljokuitaala JESUS KRISTUS.

## ONDJENDI.

Auambo atuhe mevi ljuushimba otu li mo oondjendi. Ojendji haje shi dimbulukua, ihe ojendji tua dimbua no hatu indike ko omadiladilo getu.

Oluindji ndu uvu kua tiua: auambo mboka haje ja nkuka kontraka, eeno shili, ojo oondjendi. Etumbulo ndika ljejooloko ljaauambo mevi ndika ljuundjendi, ohandi li diladila omasiku ogendji - no handi njengua. Opo pua piti omasiku omashona sho nda li nda pulakene auambo ja imbi mongerki mu Luderitz nomeho gandje ga tonata ihe, nonda mono uundjendi oshike.

Omukriste omukuetu, okukala kuetu taku holola uundjendi uetu mUushimba no muujuni. Onke ano tu longe iilonga jetu nokudiladila. Osho nOmuaa Jesus ta ti: „Kamu shi shi nani nokutja ongame ndi nokukala mu mbika ja Tate?" Tu kaleni ano ongondjendi no miilonga jetu ajihe opo Omuaa e tu ade oondjendi mevi ndi.

B. J. Kusta,  
Bethanie.

## OOMBIRIVE.

Frans Amos Swakopmund oku nekundo: Noshimpuiju sheni ashihe shi umbileni kombanda je, oshoka oje te mu silo oshimpuiju.

Josef Shitenja Walvisbay ota ti: Linekela Kalunga fimbo u nomuenjo.

Mateus Kapenda Primereskool ote tu londoda ta ti: Itedululeni oshoka oshilongo shegulu sha heda popepi.

Simon Shihepo Kaapstad ota ti: Kotokeni, oshoka uun- tsa otau fala mekano.

Alfried Gottlieb Swakopmund ota kumagida aashangeli jok Omukuetu ta ti: Mboka tamu shangele kOmukuetu, diladileni tango, ne mu konakone shili shoka mu nokue shi tunga. Indileni oonkondo dOmbepe Ondjapuki, je e mu uilike.

Jonas Nakamue Pretorius okua dimbulula nkene efuta ljuujuni mbuka li li po lja pindjala, nojendji je li po ja ningina mo nokuli. Onke tonateni oojakueta.

Abraham Jakob Klein Windhoek okua hala aveshe ava ve li po ovalanduli vOmueene va tje: Omuenjo uange kondjela eulu, linekela Omukulili.

Publius Jona Swakopmund ote tu tsomukumo: Ino tja onda pua, ndele ne kala mekondjo.

Shikungulu Vilho Tsumeb oku nelaka: Kristus oje auike eliko lhashili.

Henok Mikael Swakopmund ota ti: Patululila Omuaa omutima guoje.

Benjamin Adolf Orangemund oku nekundo: Tala, ngame otandi ja mbala, nondjambi jandje ondi ji na oku ji pa okehe tuu ngoka shi cike piilonga je.

Teofilus Joel Pietsonderwater oku nelaka: Njanjukilueni ekulilo.

Kleopas Nelago Tsumeb oku uvite oluhodi oshoka pua holoka ongerki joshiveva, nojendji oja eca elongo lja Luther noji igameke kongerki ndjoka. Omuaa Jesus ota ti: Diginina shoka u shi na uaa jugue nando kulje oshishani shoje.

Simon Nakamue oku noluhodi, oshoka aagundjuka oje- ndji ja gandja oonkondo duugundjuka uauo muuhalu u'uujuni mbu- ka, note tu kumagida tu digimne egalikano, opo tu vule okusi- nda okoonkondo daljo.

Abraham Angula Otavi oku nelaka tali ti: Tu lalakaneni okucika mevululuko ndjoka, kuaa kale nando gumue ta punduka e ta ningi oshiholelua shetangalalo.

J. G. Mutota Upington oku nekundo: Natu konge oonko- ndo k'Omuaa. opo tu vule okulandula oshinkoti she tuua suunje, sigo ehulilo.

I. S. Nekuta Tsumeb ota ti: Tu icaneni Omuaa kehe ecimbo.

E rastus H. Leendongula Kaapstad ote tu kumagida ta ti: Tu iduleni shili oikutu ikulu, ndele tu djale oikutu ipe, ei- tavelo.

Malakia Shivute Otavi oku nekundo: Tu taleni ano kuaa monike nando gumue a cigala ondjalakati.

J. Mateus Olukonda okua soluhodi, omolu aagundjuka mboka taja fike po omitse dauo nomigongo, nota ti: Omukuetu, oto ihunganekele oheli.

W. H. Tuhafeni Tsumeb oku nekumagido: Omueene o- kua fja moluetu; onke inatu kanifileni ounjuni ou eemuenjo detu, ndelene natu di kanifile Jesus.

Stefanus Martin Elim oku nelaka: Oku na oondjila mbali adike, jimue jomudo omuntu e na okuenda najo. Ondjila ja ci- nana nondjila ja mbualangandja. Ondjila ndjoka ja cinana ojo taji endiua kaantu aashona, omapenda. Omboka je hole iilonga jomilema ojo taja landula ndjoka ja mbualangandja taji fala me- kano. Ou li mu jini po? Endelega u je mu ndjoka taji tala kelago oshoka ecimbo oljo efupi.

N. S. Mvula Walvisbay, Andreas Oskar Tsumeb, Hosea Hango Walvisbay, Stefanus Tomas Orangemund, Jason David Orangemund, David Nambahu Kaapstad, Mateus Kakuiju Windhoek na Jafet Naujoma Kaap- stad otaje mu kundile po.

Petrusja Katali Outjo ta ti: Ino endela oondjila mbali Johannes Helao Orangemund ote tu londoda ta ti: Tu kaleni oupafi.

Festus Kamati Imex ota ti: Inatu eca ecimbohenda li tu pitilile po inaatu mona Jesus.

Olavi Shivute Walvisbay okua hala tuua lalakanene e- simano ljuujuni mbuka ndjoka li li nena nongula kali po. Ongoka ti inekele Jesus oje ota sindi.

W. Paulus Orangemund oku nelaka: Enjumuko la Kristus olo la longelidila ovalanduli vaje enjumuko lokunjumuka koufi uoulunde.

Salomo Kornelius Union okua dimbulula nkene oje- ndji je li po ja pilamena Kalunga noji ikuatelele kiinima juujuni mbuka.



pandulo to li mono? Ino suunje, diginina shili, oshoka nkoka ua zi okokule, ihe aluhe huma popepi nesindano."

Ecigacano lini po ta popi ngeji? Oljo ecigacano mondjila jehupico. Oje cku li po ta njanjukilua epapuduko, Kalunga okue li tu pe muene. Eeno, tua guana oku li njanjukilua atuhe noku li hambelelela Kalunga. Ihe ojendji sho ja papuduka, je shi, oja ciki kekikilo, jo inaa dimbulula, omepapuduko ompadi dauo oda tulua mondjila jecigacano je li tameke no je li diginine shili. Oohapu da Kalunga negalikano otu nokudiginina tuua vulue. Johannes E. ta ti: „Ongoje omukuetu ua papuduka, ino suunje ngoje ino loloka. Jeluca omeho goje. Tala Jesus. Esilohenda lja Kalunga nali tu humbate, tse atuhe, tu uape okumona omaoli gOmbepo Ondjapuki tu cike kongodi jepandulo."

## KALUNGA IHA NJEKELUA.

Opu li omulumentu umue a vela neenkono noku li pokufia. Okua ja koshipangelo, omualikadi uaje okue ke mu kalela. Efiku limue omufita okua ka talela po ovanaudu moshipangelo osho. Eshi e uja pokandjuuo oko, omualikadi okua tja kuje: „Omulumentu uange oku li pokufia, onke hai pandula eshi ue uja po, opo u mu pe oshililo a dule kuja nombili.“ Omufita okua tala omulumentu ou, nde ta ti komualikadi: „Efjo ola shangua poshivelo shomulumentu uoje, ita dulu vali okupeua oshililo.“ Omualikadi okua diinina shili fiyo omufita a dimina nokue mu pa.

Omufita a ja kovanaudu value. Eshi e uja vali pondjuuo jomulumentu oo, okue mu hanga a kuutumba kombete. Omualikadi okua tameka okuhokolola nkene omulumentu uaje a kala po naua eshi a peua oshililo. Aveshe va hambelelela Kalunga nokutueengolo. Eshi omufita a hala okushuna keumbo, okua kumaida omulumentu ou nde ta ti: „Kaume kange, hambelelela Kalunga, osheshi efjo la li la shangua poshivelo shomuenjo uoje. Paife Omuene e ku kuafa.“

Omulumentu uinja okua tja: „Ohandi hambelele vali no handi indile vali molua shike, ame onda pama nonda veluka?“ Omufita okue mu tala nonkumue je ina tja sha vali. Omulumentu ou okua tala omualikadi uaje moshipala nokue mu kuata mokuako, nde ta popi mokule ta ti: „Oihuna paife.“ Eshi e shi tja okua tja tuu pokafimbo oko. Ino kukutika omuenjo uoje osheshi ino shiva efimbo Omuene te ku kufa mounjuni ou. Longekida eumbo loje, osheshi oto fi.

Abraham Jakob.

## JESUS KRISTUS OJE OHAPU ONENE JA KALUNGA KUTSE.

Omolua shike Jesus a ningi ohapu? Oshoka ashiche shono Tate Kalunga okua li ta hala oku shi tu lombuela, okue shi tu lombuele mu Jesus Kristus. Joh. 1:14; Heb. 1:1-4; Kol. 1:19. Oje tuu ngoka muje Kalunga te tu popica nepopico li nomuenjo, 1 Joh. 1, li vule ljomaaprofeti nomaajengeli. Oshoka ohapu ja Kalunga ja ningi onjama mu Kristus, elaka lja Kalunga kutse oljo: „Omuuandje omuholike oje ngu, mu uveni.“ Oto uvu tuu eui ljomusita omuuanaua? Heb. 3:7-8; Mat. 11:28-30. Omukuetukriste tala, ngoka ita taamba Kristus ita taamba uo Kalunga. Joh. 1:11; Joh. 5:43-44. Koneka naua Joh. 1:12. Ngoka ita taamba Kristus ota dini ohapu ja Kalunga. Omukuetu, oua taa-

mba tuu Kristus? Ou li po tuu ho endirua kuje, nou niue kuje? Ngoka auike ta kala po e niue ku Kristus, oje omutaambi gua shili guohapu da Kalunga. Ngashika ohapu ja Kalunga ja ningi onjama mu Kristus, os o cohapu da Kalunga tadi ka ninga „onjama“ mu ngoka ta taamba shili Kristus ngashi e nokutaambua. Omukuetukriste, ngele tua taamba shili Kristus omukucipo guoondjo detu nomuhupici guoomuenjo daajehe Omuaa nOmukuanilua gaaakuanilua ajehe, omutse oohapu da Kalunga tadi ningi „onjama“. Okutja ngiini? Okutja, omuntu ngoka ta mono oonkondo doku-ninga omuna gua Kalunga, omuuajina gua Jesus Kristus, omushitua omupelela. Joh. 1:12; 1 Joh. 3:1-2; 2 Kor. 5:17.

Omukuetu, oua taamba tuu Kristus, ngashika e nokutaambua? Ngele oue mu taamba, iilonga iinene ja guana, ji jelekue niilonga jeshito, Kalunga sho kua shiti uujuni, otaji longua mu ngoje. Oua valululua, oto shituluka esiku nesiku. „Ihe atuhe mbaka tatu tala niipala ja siikululua eadimo ljOmuaa ongashika mokiitalelo, otatu shitukicua tu fe efano tuu ndjoka, omeadimo okeadimo, ngashika Omuaa auike, oje ngoka Ombepo, ta vulu okushitukica,“ 2 Kor. 3:18. Tala uo 2 Petr. 1:3-7.

Eeno ngele ngoje uo oto ningi gua Kristus, nomomumvo nguka omupe tua tameke ngashingeji, otagu ku etele elago nejambeko enene. Omuaa guombili oje ta kala oluondje luoje, oshoka oondjila nomapola agehe oje oku ga shi. Ondjila joje ji mu tsika ngoje u mu inekele. Oje omucindikili guoje. Oje onkulungu okuendica e ku vule. Oje omunandunge gaaanandunge ajehe. Aiihe mbjoka taji ke ku njenga oonkondo, oje te ku sindile, oshoka oje omusindaninkondo adihe mu ajihe. Ngele ope na sha tashi ke ku njenga, pula kuje. Oohapu da Kalunga da ningi onjama no mungoje. Kaku na nando gumue gumue ta kala ina ninga omuntu omupelela.

Omukuetu ngoje, ngele to ka adika komacimbo omadigu, kala momuviimu guashili, Joh. 15:4-8. Otapu ke ja una ngoje ua kanica ombili nohole ja fupipala niimpuju ja ningi ojindji. Otaku ka holoka iilonga taji ka tona oonkondo doje adihe. Popja nga Paulus: „Ajihe otandi ji vulu mu nguka ta koleke ndje“. Nomomumvo nguka Omuaa Omukulili guetu okua hala e ku koleke, je e ku pe oonkondo no muungone uoje. Tala aluhe kuje. Eps. 121.

Inekela ekuaco lje kehe esiku.

Toivo Jesaja Iipumbu.

## EPAPUDUKO LJA CIKI NOMU TANGANJIKA; OKU AFRIKA JUUZILO.

Momagongalo gamue olja tameke maalongi. Sho je ja moshigongi - ha kehalo ljauo jene, aue, okelombuelo - oje ja nomangungutulo. Oji itala ja guana ja pua. „Otse aakriste, tua shashua, tua kolekua. Tatu pumbua shike ue?“ Omulongi gumue omukuluntu okua njolele mombapila omapulo gomatompelo gokutompela epapuduko. Ihe inapa pita ecimbo ele - omasiku gaali ageke - ongundu konjala ajihe ja ningi aandjo naakani noja hempulula oondjo dauo montaneho joojakuauo. Omulongi ngujaka guomapulo a mono uo ejamukulo ku Kalunga muene. Ehambelelo nenjanju lja hololua komaimbilo gauo, niinima jaantu oja shunicua.

Eeno, Kalunga ta longekidile egaluko ljOmuaa Jesus ondjila. Otse tua mono ejambeko lje omumvogu. Ongoje omukuetu, u li na tuu natango? Tu tindileni ano meitedululo ljesiku kehe no mOmukulili guetu Jesus, oshoka ejo lje etijali popepi li li. Maran ata!



## OTO HUPICA TUU OMUENJO GUOJE MOONKONDO DOSHAASI?

Openi pu na ngoka ta kala e nomuenjo no ita mono eso, a hupice ando omuenjo gue moonkondo doshaasi? Oljo elaka tua li tue li kundacana naamati auuambo je li mu Walvisbay. Ojendji oja li ja dimbulula, oja kaje noonkondo okuhupica oomuenjo dauo. Gumue ngoka e noonkondo oKristus. Onke aamati ojendji ja kuatiua ketilo ndjo. Oja cikama noja hokolola shoka ja cigi ja ninga kOuambo nosho ja mono enjanju moluedimo po ljoondjo je li mono.

Ngame molu uunkundi uandje oja li ja konge ndje, opo ndi je kokomboni jauo. Nando nda li ndu ucilua omasiku gatatu ndi kale ko, omoluauo onda kala ko nokuli oshivike shu uda. Kalunga na hambelelue, shoka e tu pa Ombepo je omuuliki nomupukululi. Osho keuiliko ljomuntu muene auike otali jonuka. Oonkondo doka detu itadi vulu sha nosho uujuki uetu jene itau tu hupica. Aakuetu ne mu Jesus Kristus, unene tuu ooiitaali, dimbulukueni oshinima shi: aamati je li mehalakano otaa pumbua shili okugalikanenua. Inatu ja dimbueni po. Oluindji otu na omadiladilo ngoka kutja: Osho haa ningi ngele je li hoka. Aue, inashi kala ngaaka, oshoka omupsalmi ota ti: „Ngu icane ndje esiku ljuudigu uoje, ongame no tandi ku hupica, ongoje e to simaneke ndje.” Eps. 50:15. Eps. 86:7.

Aamati ne mu li mevi ljuushimba, tamu guanica omahalo geni agehe gomutondi, sho muua uetike mua ti, opo sho tamu ja mOuambo mua ningi aakriste.

Tonateni shili oshoka nando kamu uetike komuntu ngashika mua ti, oku na gumue ngoka ha mono apehe, sigo momuenjo guoje mui. Oto vulu tuu oku mu holama? IPetr. 5:6. Aamuameme ne, oshili haljo ehala lja Tate Kalunga ku ka kane nando gumue, aue, ajehe ja hupe. Heb. 4:16. S. S. Iteua.

## ANDO NDA KANA.

Aamuameme aaholike, onda li kokule nOmukulili guandje. Ihe ongame muene nda li nde mu cigi po sho nda li tandi landula ehala ljonjama jandje. Eui lje, onda li ndi li uvite, ihe onda muena ouala. Ondaa le ndi ningine shili, omolu eikukutiko ljangje. Ou shi onda li ndi iuete omunandjo? Onda li ngaa ndi uete doojakuetu, nondi itangele sho he gongala poohapu da Kalunga, na sho kandi na oondjo da tsejika kegongalo. Ando nda kana, aamuameme.

Opo ndi li mokumuena kuandje, no te longele aniuu Omua. Onda mono aakadona aakuanjama je ja mu Elim. Oje tu uvicile moshigongi shaagundjuka. O-mauvico gauo ajehe otaga popi oondjo. Nale onda li handi ti: nima oku li peni, oku uvite ko ngaa na sho ha jaka. Esiku ndjono ongaje muene nda li ndi iuvite te kumagidua. Kehe gumue okua lombuele ndje mu shoka oshiuinaji handi shi longo. Omukadona gumue sho a lesa Gal. 5: 19-21, onda li ndi iuete, ongame naana nda kala miilonga mbika. Nonda li ndi iuete mu ngame kamu na nando uuanaua. (Rom 7: 18-20.) Aagundjuka aakuetu, ando nda kana.

Omasiku gatatu sho ga piti po okuza kesiku tua uvicilua kaakuanjama, opue ja aaniimuandi. Ihe iihuna nduno, nda ningi omunandjo, dimue opo tandi di dimbulukua. Kehe oshilonga nenge ohapu ombuinaji nde ji popile odi vule ndje momucika, noonene. Iilonga iuanaua mbi nda li handi itangele kandi ji uete ue. Sho nda uvu: „Omua te ja nondjambi, e ji pe kehe ngoka piilonga je,” onda tokola

muene nokutja kandi ji peua. Ihe ando okui uile, ando nda hupa ko.

Ngashingeji ote hambelele Omukulili guandje sho a dimi po oondjo dandje. Esiku ndjo onda galukile kuje no kua taamba ndje. Nda ningi omusiluahenda omombinzi ja Kristus Jesus, Omua guandje.

Kuume atuhe na ngoje otua taamba tuu esilohe-nda ndika? Ngele na ngoje oje li taamba, kondja nokutaalela Kristus. Ngele ino li taamba, endelega etango manga inali toka.

Katrina Akitofel.

## JAALA OONGUO DOJE MONDJILA.

Luk. 19:33-38.

Aantu mboka ja jakula Jesus sho a kauile ku Jerusalem, oja li ji igandja shili mejakulo ndjoka. Oja diladila ashike shoka e shi pumbua. Muene guokasino ina tinda, sho u uuvu Jesus a pumbua ontana je. Na mboka ja jaala oonguo dauo kombunda jokasino nenge mondjila nokuli, inaa diladila ngele tadi mono oshiponga nenge tadi ljetelua mondoja. Oja li je nehala limue alike: okusimaneka Jesus. Onkee ja gandja oonguo dauo nashihe shauo, Jesus opo a simanekue shili oje Omukuaniilua na Muene guauo.

Ando ngoje ua li po, ando ua ningi ngiini? Oonguo doje doka ue di longele ecimbo ele kUushimba nenge ue di ilandele nondilo nenge ue di peua omaganano kaantu mboka je ku hoole, andola ue di ningi ngiini? Ngika to di tala odo esimano ljoje; tadi holola ongoje omumati shili. Ngele ngaaka, odo itadi vulu okusimanekica Jesus. Odo ngele da ningi esimano ljoje, nena Jesus ta mono okakololo ka dinika momuenjo guoje. Kotoka, oonguo doje daa ninge oshikalunga shoje tashi ku fala moheli!

Nenge ou shi iikutu joje iiholike oja tuu onguo ndjoka joshituci to ji pulua nge to ji megulu? Aue, otapa pulua onguo ndjoka ji ili, ondjoka ue ji longekidilua, Omukulili guoje sho kua endjelele komushigakano e nolutu luouala. Uujuuki mboka itau longelua uo itau landua. Ouo to vulu oku u peua omaganano ku gumue auike, oku ngoka e u ku longele komushigakano.

Ongoje to longele shike: oJesus tuu ngoka, nenge oonguo doje? Iihuepo, u jaale oonguo doje mondjila, Omukuaniilua guesimano a uape okuja mo momuenjo guoje.

E. Pentti.

## OHENDA JA KALUNGA.

Sho nda li kUushimba, onda mono Kalunga nkeke kua endica ndje. Esiku limue onda jile mundungu (momucima). Ano sho nda kala nokutula enono mejemele.- olja tokoka ongodi manga inali jeluka po, onke inandi jonua po kuljo. Ano sho nda kuacua ngeji nando nda li natango omupagani, onda shashua uo momuedi tuu ngoka, opo ihe nda kongo eimbilo ndi: „Kalunga ohole a kulila ndje.”

Esiku limue nda kuatua kuuvu uudigu naantu ja diladila, uguokusa.- Onke sho nda aaluka: ajehe ja kumua noonkondo. Ano osha li po sha kuminua ongo Lasarus. Ihe aakuetu ne, esilohenda lja Kalunga oljo enene shili; oshoka ota kuaca no mokusa shaa ngoka te mu inekele. Onke ondi imbi 263.

Petrus Muinda.



# OKAKOLOLO KA ANONA.



5. Shitarara a haluka noonkondo e ta tameke okuja ontuku. Ta matuka, ta matuka. Ihe sho ta tala luanima, ota dimbulula, onime taji mu landula ji nondapo. Muudigu ue ta londo komulunga gua kola. Ihe onime ja kuutumba komuidi taji mu langele. Muumbanda ue ouindji Shitarara okua dimbulukua oohapu da Amatui: „Oto vulu okugalikana Jesus, nando ku mu luete.“ Oje no a tameke okugalikana shili.

7. Pokati komulonga omeja ga ningi omaleleka. Ohaluka Shitarara okua dimbulula kutja a ciki mpoka oomvuu hadi kala. Oondjambameja do oonene de mu tilica. Omitse dado da monika nokuli. Ouato ja adika taji ende kombanda ja jimue jomudo. Oja geja, ja jeluca omutse guajo pombanda nouato oja jeluka uo ngaaka. Shitarara a gu ko, a guile kombanda jamvuu. Nokugeja omvuu ja kongo Shitarara momeja ji mu njanjagule, ihe Shitarara sho a li kombunda jajo i iumbile konima jajo momeja, no a tameke okuijogela mo. Enjanju lje, sho a dimbulula oku li pokucika komunkulo.



## ETESTAMENTI EPE OU LI SHI TUU?

1. Jesus okua valelua peni? (Mat. 2)
2. He ja Jesus olje, sho kua ti: „Ngame ndi nokukala mu mbjoka ja Tate.“ (Luk. 2)
3. Tumbula edina lja gumue guomaalongua jotango jaali ja Jesus. (Joh. 1)
4. Olje guomaajapostoli a adika a hokana, manga ina icanua ku Jesus? (Luk. 4)
5. Mateus okua li ha njola shike, manga ina njola Evangeli? (Mark. 2)
6. Mulje Jesus okua tida mo oompuiduli hejaali? (Luk. 8)
7. Olje kua ti: „Jesus e nokukoka, ihe ngame ndi nokushonopala“? (Joh. 3)

Omajamukulo to ke ga mona moshifo sha Mei.

6. Inapa pita ecimbo ele, uunimegona ua tameke okulila nokulililila, ua sondjala. Jina ja ji kuuu. Shitarara a londoloka nokuendelela shili, ta ji ondapo. Mokuenda kue a ciki komulonga gu uda omeja. A hala okutaaguluka omulonga, ihe ta njeng a e ta tameke okulandula omunkulo. Ohaluka ouala ta ada ouato ji li komunkulo. Ota nukile mo, ta kuata oshirapo e ta tameke okuduga.





## EJELU ENENENENE MU EUROPA.

Momuedi Februarie oshikungulu oshinenene she ende mefuta lja Noordsee ljomu Europa no lje eta ejelu enene miilongo iitatu: unene mu Holland no mu England no mu Belgia uo.

Mu England omunkulo guokuuzilo omulele gua jelulua muule luokoshilongo, oomaili 5 okuza kooha defuta luokoshilongo (ngashi okuza kOniipa sigo kOlukonda). Omikunda odindji niilando nokuli oja kombua po. Aantu omacele ogendji ja sike mejelu, nomajovi omilongo (ando 50,000) kaje na omutumba, omagumbo gauo ga jonuka po.

Mu Belgia iilando iine jokomunkulo gu cike poomaili 40 oja jonua po (ano uule uomunkulo ngashi okuza kOniipa sigo Elim).

Ihe mu Holland iiponga iinenene ji vule mbijaka nokuli. Evi lja Holland li li po lja siluka noonkondo, omutumba guéfuta ogu li pombanda. Opua tungicua osheela sha kolelela ekuma ekumelela hali kelele efuta lja je moshilongo. Koonkondo odindji domakucikuci gefuta omanene ga denge ekuma ndjo, olja tuuka ha palumue aluke, omeja no ga tameke okutondokela moshilongo noonkondo, oshoka sha siluka. Oshitihamano shomevi alihe sha jelulua. Iilando oja shitukica omatale. Moongulu aantu ja londo moondjugo dauo dokombanda, aakuaci jauo sho je ja, oje ja toola ko no je ja hupica nouuato dauo. Oojakuauo isheue ja jelekele okuja ejelu ontuku, ihe ojendji ja njengua no ja adika keso. Oonakusa ajehe kumue je cike 1800. Aantu omajovi omilongo taa kala meluhepoelela, kaje noonguo, kaje niikulja, kaje nomutumba. Okulokua kuolumi (sneeu, kapok) ojindji nuutalala ua geja otau digupaleke okukala kuauo e tau imbi unene iilonga jetungululo no jeopaleko. Oje na nga etegameno otaa ka mana po numvo iilonga jokupangela omakuma nokukukutika evi lja jelulua. Ihe omuongua guomomeja gomefuta ogua jono omapja, kage shi kukunua momimvo odindji.

Momimvo omacele gane inaku kala oshiponga oshinene shi cike mpaka oshoonkondo diishitua omomavi ngejaka.

Omuua Kalunga Tate na tondokele onkugo jepengo lje kehel!

## ESIKU LJA HUGUNINA - UNAKE?

Onda li nda londo momasina esiku limue nduuka koshilongo shokokule Eshina sho lja cikama posasiona jontumba, mpoka pua li pua cikama aantu ojendji, mua cikama uo kuume kandje. Okua li a njanjukua ngaa sho a mono ndje, nokua heda ko tu minike. Ihe moshipala she nda lesa mo oluhodi.

Sho a mana okukundana okua ti: „Kuume, u uvu tuu oshinima oshinene tashi ningua momasiku 20 ga Auguste?”

Ngame onda pula: „Tashi ningua peni, kuume?” „Muujuni auhe”, osho a jamukula. Ngame onda ti: „Aue, kuume, nande nande.”

„Aniua esiku ndjoka 20 ga Auguste motundi 1 juusiku, uujuni u na okuhula po. Onke ndi na uumbanda shili, shoka inandi ilongekida.”

Gumue okua ti: „Ngame oongombe niikombo jandje nde ji landica po nokuli ohela.”

Omukuauo ina vula okucikama naua, okua ti: „Ondjugo jandje nde ji landica po, niimaliva ondi na oku ji nua po, manga esiku inali cika.”

Kuume kandje, mpano nda hala uo ndi ku londode

nga kuume kandje nguka.

No te ti: Ehulilo ljetu na ngoje pamue uusiku uonena, motundi 1. Oui ilongekida tuu, kuume? Ecimbo ljokuilongekida oljo ndika, ino tega ngula.

Nekundo enenenene.

Bernhard Josafat Kustaa,  
Karibib, S. W. A.

## NGENGE TAMU UDU ONDAKA JANGE INAMU KUKUTIKA EEMUENJO DENI.

Omuene Jesus osho ta ti. Omukuetu, oua koneka tuu, noua dimbulukua tuu ondaka jomuhupifi uoje ta ti: „Ino kukuta, litedulula”? Unene pefimbo tuu eli olo efimbo lelondolo. Nge ua londoka omukuetu ove omunelao. Ope na oovene vavali tave ku kondjeie. Endelela u tokole ofje na ove opo tu ha ka lile mefimbo tali ja nge ohamba te uja okuila omalenga aje, opo tu ka kalé mouhamba uaje ualulushe. Nge handi udu ile to udu ondjovo jomuhupifi uoje, ino likukutika, ove ino mu teelelita. Efimbo liua opafite, eambo la uapala opafite eshi, ngenge hatu udeni eadjoivo daje, inatu kukutika eemuengo detu. Omuku ta, dilaila nena ove u tokole. Eimbilo 60.

Gotfried Hijona nje.

## ECIGACANO LJUKAMBE.

Mu Swakopmund omue ja uukambe u matuke mecigacano po. Ouo oua kala moshigunda pamue nuukuauo ua adika mo. Muukambe mbuka uujenda omua li onkambe jimue ji nomuenjo gua lajipala. Sho nde ji tala onda ti: „Otaji vulu tuu kumatuka pamue nuukuauo?” Onda ka pula muene guajo nokua ti: „Otaji vulu.” Ngele to ji puuo, ko otake ku tala ouala nomeho, manga uukuauo tau ku tala ua cikameka omitse. No moku u tala onda pandula mbuka ua cikameka omitse.

Esiku ljematuko sho lja ciki, onda ji ndi ka tale, nkene tau cigacana po. Mboka ua gandjua tango oui ili, nkoka kake po. Mboka oua matuka naua, ihe kandi na oonkondo oku u tala. Olutijaali kua gandjua umue na nkoka opo ka li. Nda cikama ndi tale nkene taka tondoka. Onda ka tala ka fa ke li konima, nanzija oke li komeho guukuauo. Nda diladila, ngiika taka cigua po tuu, aue, oko ka ciki po nokuli tango. Onda ningi ngini? Onda pandula noonkondo, nosho uo jakuetu. Omukauili guako a pandulua no ine enda ue pevi. Ando kua li tashi vulika, ando nako inaka enda ue pevi. Uukambe auhe mokumatuka kuauo kapu na nkoka taka pandulua, ngele nkoka ke li komeho nenge konima. Ihe nkoka taka piti tango mongodi jepandulo oko tuu taka hakelelua nenge oka li konima potango.

Johannes Eliakim ta hokolola ngaaka e te eta po ejele, kutja oshiguana shaauambo oshi icanua uo mecigacano po, nando sho shene sha kala hashi tala pevi, ngashi okakambe nkejaka, inashi cikameka omutse guasho. Johannes ta tsikile ko, ta ti:

„Okonena ndu uvite ecimbo ljokumatuka lja cikana. Ngoje ou li mondapo jini po? Onkambe ndjino sho ja kuata komeho, oja li ja tala okuadika ku dika di li konima. Nangame uo otandi matuka opo ndaa adike kushoka sha tida jaakuetu sigo oponodi jepandulo. Ongoje nguka ua tameke nokuli ematuko, diginina shili oshoka komeho oku na shoka tashi lalakannua ku mboka uo je li konima. Pamue ongoje ngoka ua matuka naua nena nongula to cigua po. U shi e-



## OMUSHIGAKANO GUA KRISTUS.

„Ohatu uvica Kristus omuaalelua komushigakano.“  
1Kor. 1:23.

Opo tu uve ko omushigakano ando tu ipule omapululo gamue.

Kristus okua li u uvitile ngiini omushigakano gue? Ogua li ando omutenge guaa shi kuhumbatua? Nenge ogua li ando oshiponga shombadilila? Ogua li ando ehulilo ljiilonga, nenge ljomuenjo gue? Kristus mokupopja oshinima shika okua ti ngeji: „Omuna guomuntu okue ja okugandja omuenjo gue iikulila jojendji.“ Mat. 20:28. Jesus mokupopja nambejaka taa ji ku Emmaus okua ti: „Hajo tuu mbjoka Kristus kua li e noku ji hambata nokuja mesimano lje?“ Okua lombuelele Nikodemus a tile: „Ngaashi Moses a jelucile ejoka mombuga pombanda osho tuu nOmuna guOmuntu ota ka jelucua opo shaa ngoka e mu itaala a mone omuenjo gualuhz.“

Inima mbika okue ji popile uo na Moses na Elia kondundu jejelico. Mu Getsemane kua galikana lutatu: „Tate, ngele tashi vulika, oshitenga shika nashi pitilile ndje po.“ Nokua li a soluhodi sigo okusa. Nomazigude ge oga lundulukile mombinzi. Oluhodi nduno lua li momuenjo gue inalua etua ando kokuhepekua nkoka kuopalutu nenge moluomasheko ngoka e na oku gi ididimikila. Ando kua li a tila iinima mbika, ando aahokololambinzi nomapenda geit alo ando oje mu vule. Mokuhepekua kua Jesus omua li sha shi vule omahepeko agehe kombanda jevi. Okua tseja kutja okua jalulilua mongundu jaskolokoshi. Noondjo detu adihe oda li kombanda je, opo a hambate oongunga necingo ljomuntu. Opo e tu galulile ku Kalunga ketu.

Kalunga muene okua li u uvitile ngiini omushigakano gua Kristus?

Oku na aantu ojendji kaa uviteko kutja Jesus omoluashike a aalelua komushigakano. Kalunga oje ohole, omolua shike ano kua ka ningua eso edigu ku Golgata? Kasha li ando sha guana ngele omulunde ta hempulula oondjo de?

Omua ota ti: „Ngaashi uuzilo u li kokule nuuninginino, osho tuu ta kaleke natse omajonagulo getu.“

Mu Jesaja Jehova ta ti: „Oondjo deni nando nadi kale da tiligana da fombinzi odo tadi jele da fuutokele uouene, nonando nadi kale oontiligane da tili-ganenena, otadi jele da fomafufu omatokele.“ (Jes. 1: 18) Omua ota dimi po oondjo detu e te di umbile muule uufuta. Ope na natango ojendji kaa shi shoka omushigakano tagu ti. Ihe eagulo okanjuda nuugoja okaapakani. Jesus okua lombuelele oshilema shomu Kapernaum: „Oondjo doje oda dimua po,“ nomukiintu nguijaka omulunde a guajeke oompadi de: „Oondjo doje oda dimua po.“

Otu tje ando ngiini? Omushigakano ogue ja ando Kalunga sho ina hala okudima po oondjo puua nomushigakano? Shi valelue, moBibeli itamu popiua oshinima sha tja ngeji. Omushigakano haguo etameko ljedimopo ljoondjo. Guo haguo etameko ljohole ja Kalunga okuhola omuntu. Ihe ohole ja Kalunga oja hololua ouala naua sho a gandja Omuaana auike a alelelue komushigakano. Ano omushigakano gua Kristus ogua landula ohole. Olje ngo ta vulu oku shi ludika? Kalunga okua li e hole omuntu nomanga omushigakano inaagu ja. Ano omushigakano ogue ja Kalunga sho a li e hole uujuni. Ano tango ohole opo ihe omushigakano. „Oshoka osho Kalunga a li e hole uujuni

Oje a gandja Epona lje.“

Omoluokujona kuomuntu Kristus okua li e noku-sa momushigakano. Tashi ti: Jesus Kristus okua si onkombambinzi joondjo domuntu. Oshoka opua li pe na okugandjelua sha, andjambo ndjoka ja guana okukuataganica omuntu nuujuki nuujapuki ua Kalunga sigo aluhe. Ihe omuntu sho inaa uapa okugandja andjambo nojika, Kalunga moluohole je okuhola omuntu okua gandja Omuaana gue omuholike. Ino limbililua ohole ja Kalunga nando okashona. Ondjambo ndjika oja guanenena sigo aluhe. Otu na okupandula Kalunga omoluajo.

Elaka etoje komulunde oljo ndika: Jesus Kristus okua hambata oondjo detu molutu lue komushigakano. Eso lja Jesus olje etele uujuni omuenjo. Gumue auike kua sile oondjo oje Jesus Kristus Omuaalelua komushigakano. Ondjambo juulunde ojo eso. Ihe oje okua futu oondjo detu opo tu hupicue. Kaku na ue epangulo ljokukanica mboka je li mu Kristus Jesus. Kehe ngoka iitaala Kristus okua manguluka moondjo nomeso. Sakeus Andreas.

## MEI

1 V. 2 Kor. 5:16-21. Kol. 2:16-23.

2 Sa. Rom. 1:18-25. Kol. 3:1-11. Eps. 98.

1 Joh. 3:19-24. Joh. 7:37-39. Sak. 13:1.

3 S. Os. 4 ja landula Ejumuko.

4 M. Ef. 5:8-14. Kol. 3:18-4:1.

5 D. Joh. 6:66-69. Kol. 4:2-6.

6 W. Luk. 19:29-40. Kol. 4:7-18.

7 Do. Mat. 21:12-17. Nahum 1:1-8.

8 V. 2 Tim. 2:8-13. Nahum 1:9-14.

9 Sa. 1 Sam. 16:14-23. Nahum 2:1-14. Jes. 55:6-11.

Jak. 5:16-20. Luk. 11:1-13. 2 Mos. 17:8-15.

10 S. Os. jegalikano.

11 M. Mark. 1:35-39. Hab. 1:5-14.

12 D. Jak. 5:13-18. Hab. 2:1-4.

13 W. 1 Tim. 2:1-8. Hab. 3. Eps. 110:1-4.

Ef. 4:7-13. Luk. 24:50-53, Eps. 110:1-4.

14 Do. Ejeluko ljomukulili.

15 V. Kol. 3:1-4. Sef. 1:1-7, 14-18.

16 Sa. Luk. 18:1-8. Sef. 3:8-13. Eps. 42.

Eps. 25:7. 2 Tim. 1:7-8. 1 Tess. 4:2-3.

17 S. Esiku 2 ljejalikano.

18 M. Joh. 14:15-21. Jcel. 1:1-15.

19 D. Joh. 15:17-21. Joel 2:12-17.

20 W. 1 Kor. 2:12-16. Joel 2:18-27.

21 Do. Joh. 7:37-39. Joel. 2:28-32.

22 V. Heb. 11:32-40. Iil. 1:1-14.

23 Sa. Jes. 41:17-20. Iil. 1:15-26. Hes. 36:22-28.

Iil. 2:36-41. Joh. 14:15-21. Hes. 36:25-27.

24 S. Pentekoste.

1 Joh. 4:9-15. Joh. 12:44-50. Jes. 44:1-6.

25 M. Omandaha ja Pentekoste.

26 D. Eps. 51:3-14, 17-19. Iil. 2:25-36.

27 W. Iil. 3:1-10. Iil. 2:37-41.

28 Do. Iil. 4:5-21. Iil. 2:42-47.

29 V. Ef. 2:17-22. Iil. 3:1-10.

30 Sa. Joh. 20:19-23. Iil. 3:11-26. Jes. 6:1-8.

Kol. 1:16-23. Mat. 28:18-20. 4Mos. 6:22-27.

31 S. Esiku ljuukuatatu uujapuki.